

清代筆記叢刊

冷廬雜識

陸以湑著

二

卷之四

七

冷廬雜識卷二

清 桐鄉陸以湑敬安著

忠義傳

盧奕在忠義傳。其孫元輔。以能紹其祖附焉。其子杞。乃入奸臣傳。得罪於民教。雖有賢父令子。不能追其惡也。

李方叔

蘇文忠公典貢舉。遺李方叔呂大防有失此奇才之歎。文忠歿。方叔哭之慟。且為相。地下兆作文祭之。曰。皇天后土。鑒一生忠義之心。名山大川。還萬古英靈之氣。蓋其知己之感。有不在形迹之末者。非若薄俗之士。徒以窮達判恩怨也。

通用成語

乾隆間。京師武廟製匾。某親王邸西席江蘇貢生某。擬天子重英豪。合聖意。賞六品銜。又如倉頡廟題始製文字。盤古廟題人之初。引用成語。皆切當。

鄭太守

吾邑鄭漁帆太守心一。以名幕起家。由佐貳官至袁州太守。因病乞歸。卜居蘇州。時

有故鄉之思。題書室聯云。無可奈何新白髮。不如歸去舊青山。

義塾聯

杭城義塾。立法甚善。仁和費星橋方伯丙章。題聯云。莫謂孤寒多是讀書真種子。欲求富貴須從伏案下工夫。激勵寒畯。詞意肫切。又許齋生教授。題嚴州義塾聯云。雖非千萬閒。居然廣廈。為語二三子。慎厥初基。語亦簡貴。

卷面題詩

咸豐壬子。浙江鄉試第二場。山陰某生在闈。發狂病。曳白而出。卷面題二絕句云。記否花前月下時。倚欄偷賦定情詩。者番新試秋風冷。露濕羅鞋君未知。黃土叢深白骨眠。淒涼情事渺秋烟。何須更作登科記。修到鴛鴦便是仙。歛書山陰胡細娘某生。旋卒於寓所。輕薄之報。可不畏歟。

典獄

道光甲辰夏。陝西神木縣民李述秀。與族婦李蘇氏有私。為族女李春孩所見。欲殺之以滅口。李蘇氏以鐮柄毆傷其左右脚腕。李述秀以鐮柄入陰戶。即時殞命。移屍懸於李春孩之父果園。鄰人錢述法。望見趨問。詐稱李春孩罵伊等為賊。起衅致斃。

事聞於官。縣令王致雲據供定讞。李蘇氏援鬪毆律擬絞。李述秀杖徒。贖上。巡撫李星沅臬使傅繩勛以李春孩年甫十三。有何忿恨。致迭毆而傷陰戶。屬西安郡守李希曾覆訊。始得寔情。改讞援謀殺律。李述秀擬斬。李蘇氏擬絞。奏聞得旨。王致雲褫職。李傅李以審訊精詳。俱加二級。同時有順天通州民婦康王氏之姑康陳氏與姨甥石文平口角。為石文平毆傷。憤懣自縊。石文平賄囑康王氏偽稱病故而康王氏之戚王二素與有怨。揚言康陳氏之死係康王氏石文平因姦謀斃。指揮蕭培長王瑩訪獲審訊。康王氏等畏刑誣服。迨啟棺檢驗。適雪後陰晦嚴寒。未用糖醋。如法罨沈。誤認縊痕為被勒。遂以謀殺定讞。刑部額外主事楊文定以案多疑竇。白之堂官。請旨覆訊。始得寔情。改讞康王氏以受賄私和。石文平以威逼人致死。皆問杖流。奏聞得旨。蕭培長王瑩承審失入。從重發往新疆遇赦不赦。楊文定留心折獄。平反得宜。即擢補員外郎。二獄皆見邸抄。一失出一失入。俱訊驗率畧而然。可以為鑒。

徐鐵海

華亭徐鐵海。幼時甫入塾。即能辨四聲。塾師奇之。比長。酷好吟詩。後以飢驅。客游諸侯。足迹半天下。晚年移家清平山下。編集為清平山館詩鈔。佳句如雪消山閣寒。

叉手。月到溪橋夜覓詩。霜前一雁橫雲路。海上諸山落酒杯。皆有逸致。其六十生朝自述云。素筆生涯百不堪。關河萬里走孤驂。眼看五嶽曾經四。惟南嶽衡山未到。手散千金已過三。余自隻身出門。及移家武林。並內子故後。凡有長物。寄存戚友處者。盡為毀沒。合計三次破家。而三復之。所耗實多。梅鶴笑人徒自苦。湖山容我不嫌貪。也知浪跡非長策。直擬西泠結草庵。見者可以識其生平矣。

典當

翰林院地望清切。而每有空乏之虞。宋楊大年請外表有云。漢臣之餓且欲死。難免侏儒之嗤。孔徒之病不能興。敢懷子路之慍。行作若敖之餒鬼。徒辱甘泉之從官。近某太史作口號云。先裁車馬後裁人。裁到師門二兩銀。師門三節兩生日。惟有兩餐例餽賀儀銀二兩。裁不得。一回典當一傷神。艱窘之狀。情見乎辭矣。

蓮衣僧

蓮衣僧量雲。楚人。少習儒業。晚投空門。愛西湖之勝。棲止湧金門外之靈芝寺。署所居曰未薪室。同年音玉泉司馬德布。為題聯云。結屋古城下。洗鉢清溪傍。蓮衣工書亦能詩。嘗自題其像有快意事教來日少。故人墳比遠山多之句。

方正學

明成祖令方正學草詔。正學投筆於地。且哭且罵。致干成祖之怒。世或議其激烈已甚。方氏望溪亦論其任剛而自謂不屈者。以聖賢之道衡之。正所謂震於卒然而失其常度。不知其哭罵之時。乃正氣所達。不能自己。顏常山舌。段太尉笏。古人類此者多矣。何獨於正學而議之。善乎明史傳贊曰。齊黃方練之儔。抱謀國之忠。而乏制勝之策。然其忠憤激發。視刀鋸鼎鑊。甘之若飴。百世而下。凜凜猶有生氣。論斷平允。可以息衆喙矣。

張杞山

震澤張杞山布衣。夢質樸無他嗜好。惟喜為詩。著有吟雪軒詩稿。句如寒雲沈浦雁。暮雨入江湖。亂紅霜後葉。一碧水中烟。閏九月。同人游荻塘云。登臨休悵是他鄉。秋老林臯野菊黃。今日招邀須盡興。百年幾度兩重陽。山塘雜咏云。白紵清歌風擅場。至今水調聽吳娘。蕭蕭暮雨紅橋外。不是離人也斷腸。雅有石湖風味。

沈蟾客先生

嘉興沈蟾客先生。攀桂同年。石庵孝廉養和之尊人也。喜行善事。以郡城南北官塘圯沒時。時溺人。乃倡捐修築。躬自監督。不辭勞瘁。自嘉慶己卯至道光壬辰。塘路百

二十餘里。皆陸續修固。賦詩紀事。有問津不唱。公無渡。百里湖山。指點中之句。

閔中丞

歸安閔峙庭中丞。鶚元九歲時。其外舅尚書毛公。於元宵宴客。中丞以舊姻與焉。公作對屬客曰。元宵不見月。點幾盞燈。為河山生色。是日適屆驚蟄。中丞即對曰。驚蟄未聞雷。擊數聲鼓。代天地宣威。公大稱賞。遂以女妻之。

楊忠武公

近世名將。以崇慶楊忠武公。遇春為第一。才勇既偉。知遇亦隆。由固原提督。遷陝甘總督。武臣授文職。曠典也。公髯長三尺許。經大小二百八十餘戰。無不身當先。未嘗受創。平張格爾凱旋。兵初過州縣。橫甚。歐知縣。報聞。反見責。公意不謂然。比至。相責帶兵官各四十。受責者五十餘人。斬歐官者以徇。兵後不敢譁。在固原任二十餘年。每營簡練精壯三百名。以檜礮列前。繼以鳥鎗。十人一長習。進步連環鎗。以次弓箭。刀矛。噴筒火彈。層層護之用。馬隊翼於左右。署其名曰速戰陣。天下稱勁旅焉。

程京丞

吾邑程春廬京丞。同文少負異質。湛深於古。嘗讀書吾里分水書院。戲題於几曰。胸

中無所不有。一事未能到手。儒林名宦山林待我四十年後。嘉慶己未登第。由兵曹入樞垣。一時典冊皆出其手。名望隆起。方將大用。遽卒。士論惜之。

窮通翁

太倉王相國。授之督學浙江也。取士公平。人有窮通翁之謠。言所取皆寒士。宿學而能文者也。後湖北李某來督浙學。不喜典重文字。好取短篇。士之美秀者。拔置前列。貌不揚者。雖已入彀。必摘其文中疵累黜之。時有謠云。文宜淺淡。乾枯短人忌。鬚麻胖黑長。

二宋

咳餘叢攷。謂有三二宋。指宋史宋瑛。宋雄。宋郊。宋祁。元史宋本。宋裴也。余按元史。宋子貞與族兄知柔。人稱大宋小宋。明史宋克。宋廣。善書。稱二宋。又本朝長洲宋旣庭。教諭實頤。與宗弟疇。三俱以孝廉知名。時稱大宋小宋。道光癸卯。浙江鄉試。臨海宋衡。宋瑱。以同祖兄弟。同舉孝廉。其同年亦以二宋稱之。

徐瘦生

吾里徐瘦生。茂才。照工書。喜為詩。家貧。授徒自給。中年後。絕意進取。課讀之暇。兀坐

高吟怡然自得。嘗題聯齋壁云。志不求榮。滿架圖書成小隱。身難近俗。一庭風月伴孤吟。詩稿甚富。歿後皆散佚無存。

吳石華詞

嘉應吳石華學博。蘭修酷好倚聲。所著桐花閣詞。清空婉約。情味俱勝。可稱嶺南詞家巨擘。錄其尤者於左。菩薩蠻云。愁蟲瑣碎題金井。離人漸覺秋衾冷。一味做淒涼。夢魂都不雙。當年相戀意。萬種心頭記。酒醒一燈昏。更長細細溫。廉州七夕寄內。虞美人云。一年又到穿針節。樓角纖纖月。素馨棚外倚欄杆。最憶二分風露玉釵寒。人間無限銀河水。相隔長千里。九回今夕在天涯。只有心頭夢裏不離家。梁子春梅屬題春堂藏書圖。乳燕飛云。一夕酸心話。問平生說猶未忍。那堪圖畫。阿母昔兼師與父。儲取縹緗滿架。將舊日釵鈿都捨。一盞寒燈親口授。有縹車伴盡啼烏。夜衣絮冷。寺鐘打。而今回首悲親舍。哭秋風樹根。讀竟淚潸潸下。賸有緇帷常入夢。猶待殘機未罷。算此種深恩誰寫。任說馬周當富貴。痛泉臺何處頻封鮓。我亦是傷心者。學博嘗謂嶺嶠精華之氣。荔支得其七八。如敝鄉者。桃又得其二。蘭輩數十人共得其一耳。

授經偶筆

嘉興錢新梧給諫儀吉。官京師。無力延師教子。與其室陳煒卿女史爾士。親自督課。女史嘗於講貫之暇。推闡經旨。著授經偶筆。以訓子女。內則執麻枲。治絲繭。織紵組紃。學女事。以共衣服。說云。古者婦功。在於麻枲絲繭。織紵組紃。其成也。質實堅重。而可以為久。後世乃以刺繡為工。輕而易敗。朝為被服之華。夕同土苴之棄。耗力費財。甚無謂也。古者黼黻文章。以奉朝祭。此廟而不宴者也。今俗尚侈靡。婦女履底。或有繡文。是古昔祭服之飾。今緣之履底矣。又若繡衫繡扇。充溢吳市。敝化奢麗。視若尋常。賈生所謂天下不屈者。殆未有也。其言切中習俗之弊。

顧母

顧亭林先生之母王氏。崇禎時旌表節孝。即明史烈女傳所稱王貞女也。先生有與葉詡庵書。辭薦舉云。先妣國亡絕粒。以女子而蹈首陽之烈。臨終遺命。有無仕異代之言。載於誌狀。故人人可出。而炎武必不可出矣。記曰。將貽父母令名。必果。將貽父母羞辱。必不果。七十老翁。何所求正。久一死。若必相逼。則以身殉之矣。一死而先妣之大節愈彰於天下。使不類之子。得附以成名。此亦人生難得之遭逢也。蓋其辭決

而其志彌可哀矣。

孫文靖公

無錫孫文靖公爾準以翰林起家由知府歷官浙閩總督興利除弊懋著勤能乾隆戊申應北闈試報罷有贈黃炳奎詩云昨朝銀榜揭天門姓名瑣屑知誰某男兒立身有本末何物科名堪不朽又己未歲禮闈報罷作三十自壽詞云但說文章堪報國恐蒼蒼未盡生才意識者早決為大用之器

計學博詩

秀水計壽橋學博楠崇尚風雅兼精於醫著有一隅草堂詩集句如黃葉覆松徑寒泉鳴竹林風多秋在樹人靜月當門才非有用窮何怨性本多情老愈添貧閒轉覺離家好多用先愁卒歲難梅柳東風來海燕桃花春水上河豚皆妙

羅提督

東鄉羅提督思舉戰功見於魏默深州牧源聖武記者詳矣偶閱周芸臯觀察富陽凱所述逸事其智能亦自可稱非徒以武力雄一時也公嘗率兵入南山搜餘賊村人苦猴羣盜食田糧晨必發火器驚之公問故令獲一猴來雜其毛畫面為大眼諸

醜怪狀銜其口。明晨俟羣猴來縱之去。皆驚走。猴故其羣也。急相逐。益驚。越山數十重。後不復至。官夔州游擊。夔關臨峽。山水迅急。瞬息千里。鹽梟及販鬻人口者。至則鳴金叫呼。越關以過。船皆設礮械。兩旁繫大竹。彎如弓。他船追及。斷繫發之。船必覆。人莫敢撓。公募善泅者。持利鋸。匿上流水中。俟船過。附而鋸其舵。抵關適斷。船不能行。觸石破。盡獲之。又有巨惡某。唆訟。守欲得之以屬公。公佯不悅。曰。是丈官事。何語我。夜踰垣入其室。見為草狀及稿匿所。出使數人候門外。復入啟扇。人橐俱獲。曰。昨所以不許者。彼耳目衆。欲令不為備也。

字典

字典十二集。二百十四部。旁及備攷補遺。合四萬七千三十五字。古文字一千九百九十五。不在此數。韵府四聲一百六韻。合一萬二百五十七字。上平聲二千二百七。下平聲二千一百十三。上聲一千八百四十四。去聲二千一百九十六。入聲一百七十九。祇及字典四分之一。而世俗通行所識之字。不過四千有餘。僅十分之一耳。

丁掇英先生

吾里丁掇英先生元采。歸安籍。先伯父石公鄉舉同年也。刻苦好學。尤耽楷書。生平

書殿試卷不下二千本。十上公車不第。賦詩誌感云。十度長安客。途窮眼孰青。風塵徒自苦。文字竟無靈。對鏡悲雙鬢。挑燈伴一經。故交揮淚別。從此老林垌。後司鐸秀水二十年。乃告歸。卒於家。先生與多石公投分最密。遂訂兒女姻。長子虛谷學博仁咸為多石公長婿多石公罷官後。羈寓甘肅。寄先生書。備述升沈之感。謹錄於左。自別履綦。屢更寒暑。每因去雁。思作報章。而憂從中來。操翰復輟。今者一官再躋。萬念皆灰。帳設扶風。門稀立雪。酌魯酒而薄醅。聽秦聲而寡懽。奇愁塞胸。抑鬱誰語。竊願為閣下陳之。僕賦命多窮。性復寡斷。當丙寅歲。微罪去官。片帆歸里。即能名心永息。故業重溫。成茂先勵志之詩。著虞溥勸學之誥。束脩之羊。時至問字之酒。頻來。則雖不能如仲長統之樂志邱園。向子平之畢願婚嫁。而蒙來求我。熱不因人。怡怡然無所得失也。而乃貧猶乞郡。老更離家。典杜陵之衣。書孟嘗之券。技窮鼯鼠。蹟類羝羊。以致遠道間關。頻年奔走。積勞成疾。望遠難歸。迨至計無復之。而悔已晚矣。猶謂塵勞已倦。仕籍猶存。雖西笑之自慙。或東隅之可補。不意驚波復起。鍛翮重遭。當官輟之初。停忽官階之遽去。元冬垂盡。邊地苦寒。聽簫鼓而心驚。睨刀環而目斷。蕭寥卒歲。佗傺回車。何為而來。破涕成笑。二月中行抵長安。幸賴董觀橋中丞。憫窮鳥之投懷。拯枯魚於涸轍。

薦主同州講席。始得暫為枝借。免作飄蓬。然已精力俱疲。神魂欲竄。每當天寒日暮。月冷風淒。一燈熒熒。獨與影語。幾不知此身猶在人世也。或者謂羗村杜老。終遂生還。窮海坡公。虛傳死信。苟年華之未邁。豈歸計之難成。不知松菊全荒。終當乞食。焦蘇不爨。何以為家。倘使憔悴還鄉。啼號舉室。青裙病婦。貧無沽酒之釵。白雪嬌兒。寒索然糠之火。乞數升而未得。米市價高。懷一刺以空投。侯門終絕。劉伯龍徒為鬼笑。阮嗣宗莫救途窮。而且家少薄田。縱乏催租之吏。客持舊券。還須避債之臺。呼負負兮。誰憐。抱區區而莫訴。斯時也。即房中奏曲。亦作秋聲。膝下含飴。都無甘味矣。又何如飛鴻印雪。一任留痕。落葉打窗。長為行脚也哉。嗟乎。試看白髮已逼殘年。不及黃泉。更無歸路。興言及此。涕泗交頤。想閣下聞之。亦必為之撫膺三歎也。韶春餘閨。晝景方長。閣下作明山賓之學官。坐元行冲之講席。酒材分致。菜把生香。官不勞形。夢亦成趣。君誠樂矣。僕有憾焉。憶丁未歲與君同赴大挑。君乃薄外吏而不為。僕則得冷官而復失。寒氊無分。皓首徒悲。緬想曩時。祇增浩歎。在蜀時曾有奉懷句云。宦海無波只此官。由今思之。斯言益信。端函削牘。聊布夙心。愁人之言。動多激楚。伏惟鑒察。不盡依馳。

倪烈婦

倪烈婦。仁和王通甫女也。年十七。嫁東里倪德昌。三月而寡。謹事舅姑。不衰。閱八年。舅姑以家貧。欲嫁之。陰納聘。行有期矣。先一日。乃告之。婦佯諾。即晚檢半臂一。耳環一。以與姑曰。是猶足為數日養。夜半投於河。遲明。父至。述夫婦同夢。女歸以死告。且謂上帝命為河神。無苦也。方共駭愕。里中譚傳太平橋河有屍。被髮蒙面。上下衣密縫。視之。則婦也。凡溺者。男覆女仰。而婦屍獨覆人。莫不異之。此道光八年四月事也。九年。詔旌其門。里人為塋於棲霞山下。趙茂才之琛題其華表云。碧水冷銀瓶。祠近岳家。追孝媛。青山標石碣。墓隣孫氏聚貞魂。

除夕奏凱

逆四張格爾背叛。四城失陷。宣宗成皇帝。命大學士長齡為揚威將軍。統兵征剿。四城收復。張逆潛逃。至噶爾鐵蓋山。為兵丁楊發田大武所擒。其時為道光丁亥除夕。將軍馳奏凱音。有句云。開九重之闔闔。懽傳鳳閣椒花。聽萬里之鐃歌。喜溢鰲山燈火。銀禧彩勝。祥光爭耀於紅旂。玉燭金甌。瑞氣常凝於紫陞。切時令抒詞。非比尋常。稱頌。先是克復四城時。張逆潛逃。有議請割棄四城者。有議屠戮叛眾者。將軍以四

城失守。援兵未至。半多逼脅。良莠難分。誅之不勝誅。且出卡。即外夷部落脫使羣起。疑懼。鉞而走險。為張逆添羽翼。與四城為勁敵矣。於是脅從出卡。眷屬得免。緣坐竟藉以勾攝張逆。入卡就擒。人莫不服籌畫之善。

魏侍御聯

天竺白衣送子觀音殿楹聯甚多。皆庸淺不足道。惟錢塘魏春松侍御成憲所題。裁對自然。不失讀書人吐屬。句云。白衣仙人。瓶中水楊柳。朱芾男子。天上石麒麟。

蜈蚣入腹

明張冲虛吳縣人。善醫。有道人以竹筒就竈吹火。誤吸蜈蚣入腹。痛不可忍。張碎雞子數枚。令啖其白。良久。痛少定。索生油與噉。遂大吐。雞子與蜈蚣纏束而下。蓋二物氣類相制。入腹則合為一也。事見吳縣志。按明江氏瓘名醫類案。亦有一方云。取小豬兒一箇。切斷喉。取血。令其人頓飲之。須臾灌以生油一口。其蜈蚣滾在血中吐出。繼與雄黃細研。水調服愈。南方多蜈蚣。且家家用竹筒吹火。嘗有是患。錄之。

食忌

醫書所載食忌。有無藥可解者。錄以示戒。痧症腹痛。誤服生薑湯。疔瘡誤服大麻花。